

劉

孟

塗

集

孟塗後集卷十三

桐城劉 開明東

感遇

孤鳳出西沼四海仰光儀
飛飛未去久歛翼丹山陲
倦遊隱深霧百鳥安得知
靈物餐已遍竹華非所宜
思欲陵倒景顧望今何時
世無瓊樹枝誰能救汝飢

幽蘭久不采春晚淪孤芳
衆蜂喜得之頂以獻其王
好善本同性推賢古有常
矧茲空谷艷羣稱爲國香
物類尙知此人情故難量

種竹十餘載猗猗臨水湄
秀色信可悅未得出高墀
本因繁枝蔽直節無由施
秉介固物性扶植須人爲
徒云造化力造化寧汝私

東風入林薄羣卉發奇姿崖下有芳草映日何離離軒霞冒丹
秀宿雨滋紅蕤過客競攀折光采炫一時西嶺有孤松青蓋天
半垂覽者不能至雨雪徒紛披亭亭百尺上獨立欲何爲
世情徇利祿得失競鎔銖風波亦何常愛憎生有無朽脯投地
上蟻見卽來趨同類爭相賀負之歸堂隅忽然覆杯水平地成
江湖棄脯各逃生或至沒其軀富貴亦如此康衢多畏途途窮
乃空哭阮公亦何愚

朗月照孤帷流光散空碧曠土多疑懷獨居竟愁夕靜言思昔
事百感此俱積七雄方虎鬪秦獨錫金策楚懷豈弱邦地廣跨
七澤兵敗不自強隆祀以求福瀟湘多芳草采之如金液神風
吹蘭宮靈雨飄蕙席女巫善窈窕被服朱與赤醉舞生橫姿致
語傳靈迹雲君恍惚來桂旗揚咫尺君臣事荒誕巫言何足責

舉國盡昏醉寧知時事迫屈子無他故獨醒遭擯斥作騷問彼
蒼仰視虛空白天亦有醉時繁辭問何益

襄子滅知伯豫讓爲報仇國破名俱辱一士猶千秋感恩何論
人願將身命酬成敗無異志愧彼冠帶儔今我獨憑弔感歎淚
交流知氏雖云亡趙國亦廢邱但餘橋下水終古思悠悠

賢愚各有遇升沉無定期絲粟關時命人力何能施買臣負薪
日讀書常苦飢主父久遊學四十無人知妻孥不相保親戚或
見離一朝入長安上書伏丹墀天子善其策驚歎世所稀召見
未央殿溫語頻下垂公等昔安在相見今何遲賢士困巖穴再
拜讀此辭掩卷爲涕泣嗟嗟彼一時

漢家際全盛化治隆九垓神武自天縱文采出睿裁泛舟汾水
曲作詩栢梁臺落葉寄哀怨秋風起裊同天末懷佳人絕域求

龍媒遂令啟函谷天衢向關開卜式起牧監衛青奮草萊嚴助
東吳出日磧西域來吾邱擅智畧方朔善恢諧濟濟廟堂英各
自炫奇魁一言賜金帛再言分瓊瑰君臣道既合風雲亦相催
董生不求達拔以冠羣材公孫老何能晚亦履三臺求賢有如
此寧至困塵埃丈夫思濟世七尺負崔嵬幸逢憐才主誰甘巖
壑隈所以太史遷被廢愴心懷不忍棄盛時非徒怨形摧問君
後千載慨想胡爲哉

寒溫生異姓相反實相成絳侯本無文乃能知陸生陸生游漢
庭聲譽起公卿一語將相和信者唯陳平世人矜政績轉謂儒
術輕南陽有名士羽扇坐麾兵

我昔游睢陽征途暗朝昏寒雪漫千里何地尋梁園飛觀無遺
址層殿餘荒墩河水泛村郭比戶皆頽垣牛羊牧城中過客車

無喧酌酒聊自慰灑涕誰與言因憶平臺客高會集朱門帶露
晨作賦秉燭夜開樽主旣擅文雅賓亦氣騰鶩吞雲冒綠池秋
月麗文軒宴游極歡樂寧知黻冕尊興發登高臺四望憂中原
稱詩各言志雲夢恣吐吞黃金酬上客白璧賜王孫勝時不可
再高風近誰存我生不竝世弔古忘寒暄感念諸賢遇不啻身
受恩盛衰憶今昔行矣勿復論

少小耽儒術潛志探元精十歲誦典墳吐詞先達驚十三攻書
史十五好論兵上書謁宗匠一見爲心傾二十工文章遨遊抵
公卿三十遍海岳驅車至神京射策不見收將歸務躬耕致身
本無術非敢棄時榮行行過邯鄲將近大梁城道逢一異士貌
古氣縱橫謂我有奇骨勉旃毋自輕法應早出世會須朝上清
何不自矜惜而徇世俗情混迹和其光慎勿標英聲再拜謝君

子自愧身無成求名爲飢驅性本薄簪纓但恐賦命微敢望棲
蓬瀛人祿且無分天秩安能爭君言吾未信此誼竊心銘

日出照城北飛閣鬱輪囷列戟號通侯甲第冠平津新承漢皇
寵功成繪麒麟起園南山側跨橋渭水濱土木被華錦花鳥媚
繁春門外何賓客欸接無虛辰往來停飛蓋絡繹盡朱輪遠方
寒賤士有策欲上陳門者弗爲納卻立望光塵平旦卽造請日
午猶逡巡富貴無貧交緩急誰與親

去去君莫遲世事固難知梁鴻西出關五噫空悲思臨水濯素
纓登山采玉芝挽車空谷內歷久情未移回首望洛陽何如舊
來時

維地有四瀆濟水先淪亡獨清衆莫容厥流遂不長同類竟相
并嗤彼淮與黃豈無伏地流幽潛良足傷高才被羣謗讒邪排

善良人川且不死。士何慨慷。

桃李百穠艷灼灼。爭春妍掩映。背夕月爛漫。臨朝烟花前。有高樓一父垂翠鈿。自矜容絕世。對花甚相憐。日日開朱牕。風起廢晨眠。紅芳難久持。花亦委逝川。佳人怨零落。悵望長涕漣。涕漣亦何爲。春事方延綿。今茲香已歇。豈曰無來年。落後雖狼籍。開時還復鮮。東隣舊時女。顏色誰如前。

梟鳥多族類。秉性俱不良。桑扈豈乏食。好音終我忘。自倚托喬木。日夕陵風翔。中途遇破鏡。相從集高岡。凶物忽得勢。長鳴氣飛揚。偶然見鷺鷥。羣呼爲不祥。五色素未睹。驚怪固其常。東家有棄戢犬食。遺道中桑扈竊其餘。銜以誇飛鴻。物情矜所貴。要路氣如虹。輿服光赫奕。騎從何雍容。寧知高尚士。游心棲冥濛。浮雲視富貴。達觀忘窮通。今我臨止水。安問流西東。

讀史

廢興自古有茲事久難言鴻荒去已邈爭奪何紛喧往時百餘
國犬牙相并吞誰非黃帝裔同姓無救援養馬何功績稱帝有
子孫庭堅號才子明德祀無存變遷及楚漢戰氣橫中原約和
既罷歸追迫等窮猿兵家計勝負信義誰復論帳中泣美人哀
歌聲煩冤赤眉盛戈甲黃巾秉旗幡誅鋤無少長朝日爲之昏
人命雖云重未能比鷄豚漢家十二葉流澤延後昆休養四百
載故老忘寒暄芟夷一朝盡哀昔生齒繁蔓草亦何辜但繁死
者魂五季更紛紜戰鬪如雲翻震蕩駭川岳奔騰覆乾坤兵氣
與火光所向無仇恩凶邪竊國柄善類皆竄奔沐猴戴華冠列
卒乘高軒殺人莫敢禁狡兔走爰爰天心方縱亂得時卽爲尊
聖賢旣不作仁風孰云敦匹夫孰亮節感涕徒潺湲

昔者衛庾公古稱爲端人不忍害孺子抽矢而扣輪此事脫在
今必曰非忠臣忠孝本至性矯俗豈其真蘇章按友罪立名以
榮身俗儒或歎息識者謂非仁秉衷先旣薄安能厚君親嚴刻
以爲直世風滋不淳所以古吉士靄靄爲國珍一誠能動物萬
類歸陽春不情卽姦慝人語寧無因

林端集杜宇云是蜀帝魂家國思無極嗚咽且聲吞語卿勿吞
聲忍淚聽我言興亡事非一陰陽變晨昏藻井成荒圃離宮餘
廢垣王侯蹈白刃帝子降青門人謀固不臧天道亦難論符堅
最仁慈信義素所敦混一志不就乃至喪其元姚萇弑主后據
關自稱尊滅義身榮華威聲動西崑此理誠莫測天高閉九閭
今汝本微渺形化身幸存自古皆飲恨何爲獨鳴冤
強弱有定勢異謀無由起句踐誓滅吳爲報會稽恥力小疑弱

大世變從茲始所挾在用謀地廣亦難恃勝負旣無常英雄竊
自喜帝王興草澤風雲啟自此

寄懷馬伯固

與君登高樓平野何連延寂寂大梁城乃在落日邊四望無
極身世正茫然退念我身後追想古人前遙恨自天來飄風與
迴旋行行遇古寺且復經市廛夷門不可求勝跡今誰憐俯仰
千里內沙草與人煙日暮至酒壚痛飲如吸川今昔恣談笑清
尊勝管絃我酌已云醉君意猶纏綿丈夫思建業當爲天下先
旣已被棄擲且宜娛林泉努力事酣飲猶懼憂來纏何能負元
髮安坐待華顛匹夫營一飽無事日醉眠達人自怡悅寧問世
稱賢感君惠愛情願報瓊瑤篇升沉此遽別相期寶盛年

卽事有懷姚幼樵

落湖痕白林空石氣清亂沙推岸出濕霧壓山平邱壑誰同
志煙霞笑此生窮愁還自惜珍重故人情

書齋有感

四山風雨集高館獨遐思出處挑燈夜升沉掩卷時易平千載
恨難覓一人知竟夕憑誰語幽懷且自持

與魯岑夜話有贈

殊賞千秋後深交一夕中相知今勝昔此別雨還風君亦浮湘
北余將適越東前途話身世且勿怨飄蓬

望潛岳

山形東走勢崔嵬散作龍眠夫不同日暖翠隨千嶂出雲開天
放一峯來瓊芝自昔歸丹竈鉄鑊如今閉綠苔亦有司元仙洞
在幾時攜杖踏風雷

題幼樵詩卷

今古兩行淚乾坤一卷詩此才原破格我輩竟同時白日天雞
唱青霄海鶴姿別懷吟不盡記取十年期

天外

天外浮雲日往還靜中春色滿柴關異書讀遍愁難卻滄海游
歸迹愛閑風雨入懷憐故舊文章放胆爲江山一杯且向花陰
醉明月峯頭弄白鵬

寄懷家蘭巖廣文

世俗紛紛好燕石卞和有玉空自惜吾家大阮負豪邁獨破羣
閭具奇識交游肝胆疑古人意氣雲天生羽翼憐余早歲文能
奇縱談今古同襟期羣兒竊笑公不顧枯松倒澗公扶持我與
公別游京洛新知強對無歡樂燕市悲歌曲未終立馬黃河指

西嶽高才得路非無人腐儒只合填溝壑歸來江上且銜杯望
公不見徒生哀公亦自喜得暇日詩城酒國稱巨魁嗟公同輩
已寥落天涯懷舊感雲鶴高臺醜酒風蕭索廣文先生原冷官
公居乃不憂饑寒苜蓿可飽卽快意一生長覺天地寬相思千
里非睽絕仰首當空見孤月願公寢處自怡悅寶刀莫使輕削
鐵鄭虔三絕何足矜要令冷骨撐風雪江南春盡滌雨滋淮泗
漲高吞陂池公之所治無城郭蛟龍雜處煙迷離丈夫有志須
濟時可惜公抱絕羣畧身投閒散無處施桃李可樹卽教育爲
國惜起淩霄枝慎勿便賦歸來辭

看花曲

溪頭看花女思欲比顏色行行至花前含羞怕久立
昨來杏花白今見桃花紅花開有先後同日嫁東風

花飛落人前人老在花先但願身如花千秋長少年

七夕

自攜瓜果薦芳辰月色今宵比昨新記得長安風露冷雙星曾照未歸人

孟塗後集卷十四

桐城劉開明東

過龍門寺

白雲自來去山鳥未曾驚僧自林間出人從澗底行攀蘿親石
色汲水聽溪聲因共樵翁語前途暮霞橫

自麻山夜歸留贈

夕霏滿林壑歸路暗難分月出夜偏寂山空語易聞賞心留片
石勝境付閒雲且訂後來約相隨鸞鶴羣

客至

幽意向誰訴前村鳥正還客來蒼翠外門掩暮雲間移榻風生
牖烹茶月上山嘯歌對庭樹曲罷尙餘閒

寄懷鮑覺生侍郎

我生二十有九春遨遊海嶽窮風塵宇內奇才交欲遍生平不
敢虛推人雙五先生今詞伯與余邂逅稱莫逆吐論直空並世
雄揮毫欲奪前賢席武昌六月生飛濤江天不雨風怒號騰脂
山下把公手湖北學使院在胭脂山下撥雲頓使青天高燈下談詩各心折
高吟盛暑疑霜雪筵前相對更有誰隔江招得漢陽月一飲十
日天使留坐我黃鶴之高樓題詩素不求爭勝到此忽若無千
秋呼公同立樓上頭力挽江漢回東流顛倒雲夢且八九何況
區區鸚鵡洲公驚我狂笑無語出示珠玉生元圃展來但見生
風雨我醉歌向大別山山頭驚起雲飛舞良時會合不可常別
公直到粵海旁誰知燕地重相聚彼此蒼茫對夕陽升沉雲水
那堪道羨公玉顏未曾老吾輩相逢寧草草人間何者爲勲名
且飲美酒沽瑤瓊醉侯尊貴軒冕輕滄海立轉西山傾一語氣

可陵公卿夜闌燭短興未畢轉愁歡盡難爲情公言人才不世
出天馬之姿鸞鳳質努力乘風決雲日我道遭逢原有時古人
感遇嘗言之今爲先生事此詞別後洛中窮眺望中原氣傲容
疎放相思得句皆秋聲河流與我爭悲壯卻憶辭公去京師典
衣贈行戒莫遲我不能卻心傷悲此身成立未可知感公斯誼
銘肝脾公以元氣爲歌詩但遇風雅長主持安石高卧起何日
蒼生共卜非吾私緘詞千里寄天涯白雲相望無盡期

哭王儕嶠太守

朔風吹入暮雲端一夕文星落地寒海內驚心凋老輩江南舊
事泣詞壇師門知遇隆桃李謂朱文正公澤國騷才惜芷蘭題我卷
頭詩句在可憐訣別記長安

東觀聲華舊絕倫西垣風骨自嶙峋新詞館閣呼才子抗語宮

門斥佞臣五馬中州心未展廿年循吏死猶貧蘭州節使深交

誼謂嚴匡山方伯應念重泉客裏身太守卒于京師

宦轍浮沉百累牽隻身攜僕入幽燕老拚心力支風雪病起吟

懷破海天病中作新樂府幾百篇一見論文真恨晚百年有我忍無傳謂病

中屬余校定尊稿西河古廟挑燈夜謂寓西河陳跡依稀尙眼前

生平

生平無過願愛採北山薇入世心常怯逢人默亦非靜忘隨葉落倦立看雲飛已悟升沉理勞人且息機

客中偶賦

暫客猶無賴臨岐憶故關自來甘淡泊不是慕幽閒強住無歡思新交尙弱顏擬同素心侶結屋翠微間

久識風塵累遲回且十年悲歡生酒後憎愛到人前虛譽竟何

補初心未忍捐冷巖有芳草好與致纏綿

聞幼樵出都卻寄

歸雁謝春色聞君辭

帝京囊方富詞藻人自薄才名軒冕非吾志文章亦世情買山
非棄俗少小愛躬耕

抵南昌賓谷中丞見贈賞雨茅屋詩集近刻奉題長句卽
以留別

我昔見公南海濱天獨展鏡面新把公詩卷日再讀真氣上
欲盤蒼旻我今尋公渡章水身與白雲相表裏百怪胡爲忽來
前公出新詩贈我矣天龍奮爪翔神霄野鶴驟見驚不起燈下
持歸忘夜闌奇氣入紙生虛寒神力佛慧公兼有天女狡獪尤
無端千斛之舟萬鈞弩公才獨運人舌吐縱橫但覺妙語多慘

淡誰知匠心苦我與公別才四年酒酣長憶珠江天江東風月
無管領六朝景運空雲煙公後黔陽擁龍節驅走風霆鞭列缺
探珠直指蛟螭穴重關複嶺高崔巍行人驚從天上來詩境到
此公重開千盤百折一覽盡蒼翠深峭胡爲哉百蠻風土無今
昔紅苗富饒赤子瘠丹砂作墻彼厭居綠荷裹飯此爭食公憫
窮寒布膏澤頌聲聽到蒼香驛就中風景亦破寂跳月佳辰競
妝飾踏歌聲透春消息蘆管花鈴禁不得桃溪女兒工怨詞竹
王草木擅顏色此時公意何從容放手直寫生奇峯或屈爲溪
深爲谷路窮石轉橫孤松又或嗜新鬪纖麗回姿作態春煙濃
深情密意細鏤刻鴛鴦貼水穿芙蓉離奇跌宕無不可筆花幻
出枝千朶中原吟遍到遐陬西南古蹟囊中收一洗龍標太白
之窮愁陳情乞養

帝優許忠孝何須分出處綠野堂高日月長南陔詩闕公能補
自古才人多數奇清閑富貴難並期公以盛名獨占得天將此
境昌公詩嗟我失志長孤羈遨遊萬里徒爾爲江天蘭芷生怨
思公不我棄加褒辭如大河受昆明池華堂銀燭張瓊卮飲我
頓使心神怡珠玉錯落天風吹此夕不醉更何時扁舟明日將
別離眼中秋色去何疾興高欲挾雲東出徑從東海探霞日歸
來攜得碧珊瑚同公架筆天南隅

題劉雪暉西泠聽雨圖

花影暗疑暮湖心生嫩涼雨聲聽隱約秋色似瀟湘南浦人方
別西泠夜正長披圖看獨立消息霧茫茫

懷謝向亭學使

落雁下空渚遙峯數點蒼故人抱冰雪秋色正芬芳蘅芷堪爲

佩芙蓉好結裳應憐天外客風雨憶三湘

將抵里門阻雨

故鄉咫尺隔雲霄人立空亭話寂寥不是青山行未盡馬頭十日雨蕭蕭

寄懷周伯恬

廿年湖海伴奔走信音稀遠出原非計相逢祇問歸曉寒侵旅思春色上征衣輪子蘭陵隱鄉關獨掩扉

孟塗後集卷十五

桐城劉開明東

將遊西湖途中值暮春有感

鳳泊鸞飄又幾旬
風光偏向異鄉新
每逢歸客難言別
纔近中年怕送春
杜牧多情憐歲景
謝公遲宦愛閒身
湖山有願償嫌晚
輸與西泠放鶴人

梁谿小住贈齊梅麓刺史

談深不覺漏聲移
珍惜西牕剪燭時
半世遇從今日厚
十年名媿故人知
論才海內如君少
把袂江南恨我遲
小住連宵難話別
錫山風景况宜詩

自梁谿泛舟至嘉興途中得九絕句

看花拋卻故園春
千里梁谿一問津
貪向溪頭寫山色
不知身

是畫中人

洞庭縹緲接空冥此去煙波路不經會上九龍山頂望浮來七十二峯青

吳門綺麗擅千秋畫舫笙歌夜未休只擬歸途問花月忽忽不化虎邱游

林煙出沒石橋橫路到江南水有情最是舟行難耐事好山當面不知名

片帆竟到太湖邊湖上斜陽水接天恰好波光清淺處草痕青拂打魚船

吳江南去水煙開日向東風醉綠醅倦倚雕牕閒不得溪山纔過畫船來

嘉禾風物足清華流水彎環路幾叉三塔寺前纔住槩萬重深

綠有人家

鴛湖游罷向錢塘訪戴城邊正夕陽
綠是浙西風土勝不栽花柳愛栽桑

初抵西湖

十年夢想到錢塘今日扁舟願始償
畢竟西湖勝西子天然濃淡不須妝

西湖偶句

花別斜陽柳折枝尋芳真恨我游遲
六橋名勝仍千古十里風煙足四時
士女行來都是畫湖山太好轉難詩
岳王墳畔愁多少寫入春情總不宜

自湖上歸用前韻贈海帆明府

攬勝連朝尚未遲故人招飲趁今時
全湖風景孤山占一片波

光四面宜西子去時猶有迹東坡吟後更無詩煙霞洞口君曾約他日誅茅莫誤期

王竹嶼通守招同李海帆董竺雲游理安寺憇清涼亭偶賦

一望雲霞鎖路隅傍巖樓閣翠模糊山川昏旦能藏日世外風光不借湖人歷數重青玉峽謂水樂煙霞諸洞天開萬幅綠陰圖清涼亭下同高卧曾否流泉入夢無

偕海帆白靈隱登韜光寺

已從峽口聽驚雷更上韜光踏翠苔竹色留人當石坐泉聲送我下山來中途雲樹千重合絕頂江天半面開回首樓邊最高處昌仙端坐煉丹臺上有昌仙像祀洞中

素雲曲

并序

素雲姓王氏明季溧陽伊密之公子之歌姬也密之才兼
文武意氣無前有豪華公子之稱聞素雲色藝爲當時無
雙以三千金聘之時有山左傅生者徒步至溧陽叩密之
之門而請見焉閹人見其來之遽卻之以辭傅曰吾以要
事報爾主何可推也閹人不得已爲通密之故未識其人
也甚異之旣相見傅不及他言但曰我山東傅某也聞公
侍姬中有素雲者爲天下絕艷某自慚寒賤生平未睹佳
麗願得一見傾城公能許我乎密之心竊訝之而外負豪
氣曰見亦何難君遠來勞甚且少坐一談顧左右命茶傅
慷慨言曰某千里徒步至此專爲一見佳人而來無他圖
也公如能許我當靜坐以俟否則無事過留也密之見其
意切辭偉乃命出見於是時已薄暮酒筵旣設佳殽雜進

酒方數巡燈燭輝映環珮鏗然侍女十餘人擁素雲而出
傅起立睇視良久嘆曰誠絕色矣名不虛矣此來爲不負
矣卽辭別密之欲行密之留之至再三曰必不可留且終
今夕之宴去未晚也傅曰所以不憚跋涉者爲欲見傾城
也今旣見矣私願已遂而吾事已畢可以行矣豈爲酒食
哉遂徑去不顧密之怏怏如有所失蓋密之有心人也始
雖訝傅生之驟來及見其容貌魁奇辭氣英斷知其抱負
卓越必非常流于是傅生旣去之明日密之太息曰嗟乎
豈有愛一婦人而失國士乎卽乘駿馬自追傅生至三十
里與傅俱歸乃重爲設宴每宴饌益豐執禮益下至數日
夜半引傅入至一處華屋雲連羅綺炫爛帷帳几席器用
之具極其華麗傅不測所以密之乃告曰君之乘輿而來

雖出無心然此中亦有天意吾將素雲贈君以償道路之
辛勤此室卽爲洞房此夕卽合卺之夕也傅辭以義不可
且不敢奪公之愛密之曰君何疑焉贈姬之事古有之矣
今君貧賤力不能致佳人吾方處豪盛何求不遂且粉黛
盈列豈少此一女子乎吾以君爲丈夫乃反效書生羞澀
態耶語未卒而侍者已導素雲出拜矣傅驚喜過望旣歛
留踰月供給備至言論愈浹傅挈素雲歸里密之具舟親
送贈數千金以資生計素雲奩中之值亦不下千餘金盡
聽隨去傅生家本貧窶自此安居爲富人嘯咏風流有司
馬長卿之樂矣居久之逆闖犯闕懷宗殉國我

大清定鼎燕京有仇人告舊姓十家蓄異志者密之亦在所
陷之內以其素施恩於人人多爲之地家雖籍沒而隻身

得脫遂竄伏草莽以待赦是時天下初定四方尙未盡平羣盜盡聚山澤密之託身其間者有年欲雪其冤而無自當此之際

朝廷新設科取士而傅生遭逢

聖世已登高第致顯仕十餘年間遂至宰輔密之聞之久矣適有舉子應禮部試路徑山下密之強之使爲致書于傅時傅公扈蹕出都素雲啟書視之驚嘆流涕曰始以爲密之家破身亡矣今方知其尙存也于是傅公歸素雲佯爲憂戚公問故對曰妾近有心疾善忘今不知母家何在也傅公笑曰夫人忘諸乎伊密之卽汝母家也曰然則密之安在傅公悲嘆曰密之遭禍及身物故早矣素雲曰君一介寒士無生人之累得以專心學業際會風雲者伊密之之

力也此恩可以忘乎傅公曰非敢忘之奈其人已死只可結草于再也矣素雲曰設使密之不死可以報德而累及君君爲之乎曰苟能及其生而報厥施身且不惜他何計也于是素雲乃以密之手書與傅公曰密之固在君何以爲計公閱畢沉吟久之益密之欲傅公爲昭雪其寃也公于是謀之二日計不遂素雲欲剪髮事佛且曰此人不能救何顏苟貪富貴爲負義人也傅公乃竭力殫思遍謀于在朝公卿欲同爲申奏而未有間會告謀逆者日多而情事皆虛

天子察知前此十姓之枉問及此事傅公乘間白之于是十姓皆赦其罪還其家產密之得出山返里矣傅公旣雪密之之寃乃專書至溧陽請密之入京師以圖重聚密之竟謝

卻之其復書以爲吾昔日之施君今日之報前後之事旣
奇彼此之心各盡可以無憾于朋友矣自茲以往君自爲
熙朝重臣吾自爲山林逸士各成一是不必相見也傳公與
素雲皆嘆息不置益高密之之爲人余謂二公與素雲其
事皆奇而密之尤爲罕見其始不拒傳公之求見其繼以
愛妾相贈其後不從入都之請割情杜私匪惟成一已之
高亦以全素雲之名也余客南康狄相圃太守爲道其事
以爲不可無傳故作歌誌之而先序其本末如此

溧陽公子人中麟戎馬煙花氣絕塵肝膽乍逢予國士身家再
造得佳人佳人居近吳江水生長容華似西子小字人呼作素
雲淡妝不喜闌紅紫自矜色藝空羣儔妝臺晝啟上簾鉤扭毫
雅擅無雙譽擇婿須求第一流公子豪名冠千古甲第連雲壓

開府聘取深閨絕代姿金釵十二教歌舞歌舞朝朝香正耐才
華色艷動東南一門占盡人間秀消息春風到處探山左右衣
大奇幻陡然叩門造庭院自云今代有傾城不辭千里來一見
主人不拒言笑歡朱筵命酒促冰盤燈燭四圍紅奪月侍兒列
隊呼傳觀傳觀良久人方至鬢挽盤龍簇珠翠海棠睡起嬌難
勝半面微紅羞欲避見罷筵前卽辭起得睹玉顏無憾矣苦留
不顧拂衣行踏過蘼蕪三十里單身來去爲看花匹馬追回遂
連理華堂設宴吹鸞笙洞房引入光鮮明素雲見贈無他意爲
感天涯徒步行倉卒固辭安肯聽藍橋擁拜立雲英不因此際
成奇遇那識他時托死生生死禍福難豫度一朝賊火燒宮闈
才人狼藉葬荷池貴主倉皇試蓮鐙君后猶成死別離人家敢
保生歡樂異代風波謠啄頻鐵騎羣來誰敢與同時九姓皆收

捕鐘鼎門高易遭妒全家驚作亂禽飛重圍奪出單戈護風塵
滿眼竟何歸且向綠林爲退步壯士頭顱活草間書生事業興
雲路雲路迢迢引畫輪可堪羣盜起荆榛干戈四擾乾坤碎
閭闔重開日月新直北旌旗回曙色江南脂粉拾殘春此時前
度受恩客登朝已冠賢良策芙蓉殿上看迴翔張蒼作相承
殊澤黃閣風高北斗秋紅樓煙暗西山夕回憶兒家初見時相
逢不敢遽相思何期金谷園邊樹移作瓊花館內枝異鄉萍水
同駕帳當年良會原非望半世恩情疑夢中一生遭際真天上
重提往事共欷歔世變人亡感舊居樽前已抱重泉慟世外飛
來一紙書書詞傳自何人手舉子途中親手受相公屈蹕夫人
敗歸來持讀喜還憂沉吟豈是心推避計到深時轉費籌閨中
悲辭氣激誓翦烏雲碎妝飾此人尙在救不得英雄兒女盡

無色負義貪榮妾不能毀容事佛君母惜相公感此淚交流傾
家問策商王侯十辰竭盡綸扉力天日方能轉鳳樓赦書星夜
下江關避罪人纔返故山燕子舊巢餘宿土梅花小閣長苔斑
自憐少小好奇異邂逅論交仗高義黃金脫手非市恩美女如
花輕棄置豈料當筵慷慨心翻爲今日生還地羅綺心灰痛昔
時骨肉人殘驚隔世只因花月擅豪華惹起春愁滿天際南北
關河聚散情存亡家國悲歡淚故人垂問尙蒼旻吐氣成霞勢
絕倫誰言佳麗能妨福不信男兒易致身施恩報德兩奇絕寸
衷各盡他何說見面翻多難盡懷從此便宜長訣別卻還來使
謝京華書將心事辭明月升沉此後各分途明慧人憐九曲珠
直將血性酬恩義不是文君念故夫從來散亂無寧軫晚季生
才嫌太盡巾幘飛騰得盛名衣冠零落成高隱曠代風流各少

年兩朝交誼終紅粉何物名花爾許妍關人衰盛自年年天教
早脫紅羊劫色界春開百卉先彌天貴盛亦煙滅休誇炙手能
炎熱舞扇歌燈有路塵花箱劍匣消春雪彩雲散後舊雨空唯
餘哀艷情淒切詞客關心譜異聞太守從頭傳俠烈恨少丹青
寫畫圖一幅雄奇好人物繁華夢短情天寬多才狡獪太無端
題詩歌遍烏衣恨留作南朝野史看

孟塗後集卷十六

桐城劉開明東

九日偕齊梅麓刺史沈閨生邱芝巖登九龍山絕頂望太湖

凌空蒼翠半浮沉浩蕩煙波豁素襟
千古詩懷爭令節九峯秋色壓歸心
時余將返里不圖泉石能留客轉喜湖山遇賞音
踏遍碧蕪天正晚洞庭回首白雲深

揔花時節趁啣杯賓主東南此一回
遠岸直從無地盡太湖遠處通海
夕陽忽送大江來山頂返照望大江更明
每當勝景思人物自古登高重賦才
看到山浮一點此身何異近蓬萊

殘霞紅湧浪花頭都向三茅寺外收
絕頂山川宜縱筆中年身世怕悲秋水
雲空濶惟飛鳥天地蒼茫看去舟不碍
仙風吹落

帽從來佳話屬名流

戊寅感秋

滿眼秋光出石城頻來翻笑此身輕經過海水琴絃激滅盡風雲劍氣平已信求榮真失計敢言識字誤平生瓊霄得路皆鸞鳳別鶴何須帶怨聲

對鏡頻驚病後顏風吹葉下亂雲間奇文積篋思焚草舊雨貽書教入山絕境我猶拚攬勝勞人天肯許偷閒塞翁得失終難定且縱扁舟逐白鷗

窮愁只合付儒冠自古才人幾達官黃菊飽餐留句遍滄江歸臥避名難風高鳥鵲聲爭喜波靜魚龍影尙寒畢竟壯懷消未盡燈前時解佩刀看

江山如此我棲遲四海同憐落第時一擲何關榮辱事十年真

負友朋知醉來別有傷懷淚愁甚羞爲憤世辭攜得歸雲坐高閣歲寒風雪伴松枝

題平二愚節端高山流水圖

開卷胡爲氣飄忽雲水浩蕩山突兀伯牙今有鍾期沒抱得枯桐訴秋月月華浸入紅蓮池蓮幕才高傾一時平生懷抱羅川嶽無人解識孤琴知桐陰獨坐秋滿地圖將山水寄幽意禿毫豈盡太古愁尺幅能收千里勢高山自聳水自深似有遺怨傳至今我從燈下窺君心情此悠悠絃外音

麥浪舫

朱嶽雲鍊師構居白鷺洲上其屋形如舟三面臨水四圍皆麥因名曰麥浪舫余與同人聚飲于此鍊師索題卽以爲贈

萬綠浮空到客前，道人居近鷺洲邊。
浪從平地搖春色，天入扁舟共歲年。
六代山川容小住，四圍雲樹伴高眠。
一樽夜話神霄事，珍重蓬萊謫後仙。

王竹嶼通守于役江寧邀余同行赴越舟中有贈

家住金陵第一洲，謂白鷺洲江山勝處有高樓。
風雲激蕩歸奇氣，空水微茫共此舟。
坐久星河驚半落，興來杯酒亦千秋。
濟時好副蒼生望，四十功名正黑頭。

重游惠山贈齊梅麓刺史

龍山秋共幾人分，鴻爪天邊去住勤。
千里重尋東海月，謂再往浙江

一年三看太湖雲。
放懷今古能容我，破格文章爲贈君。
難得羣仙同聚首，一杯珍重話斜曛。

抵吳門

空江半夜響驚雷燈火船頭浪影開一枕雲山隨夢去五更風雨破愁來笙歌重聽秋寧晚霸業消沉我獨哀可惜姑蘇臺上曲烏啼誰憶謫仙才

贈陶子靜

梁谿同聽雨絕嶺曉看湖遠水半明暗遙山忽有無斯人才秀出吾道氣寧孤此會原天意遨遊越共吳

少時

少時辛苦作書生十載屠龍技不成得失已空花任落恩仇未快劍羞鳴吳門詩酒閒時句楚國親知暫別情醉向波心拋棄稿風雷付與怒潮爭

宴集

無端鴻爪到花前羅綺關心更管弦一片彩雲吹不散那能秋

夜便如年

重至西湖遇雨

蘇隄小別未經年又上西湖舊酒船
恰是南屏新雨過水光山
氣合成煙

次紹興

會稽形勝本天開雨後秋寒歷郡臺
近水煙光隨路轉渡江山
色擁城來越王故迹惟塵土文種奇功付草萊
我後馬遷游十載盛年空負著書才

抵上虞題海帆明府畫冊

雁蕩山紀游

峯轉白雲回芙蓉萬朶開谷深天倒入
瀑對雨飛來雁宿古時
月人驚低處雷眼前游未到應爲謝公哀

龍湫山紀游

龍母來何自山深舊燭靈破胎出鱗甲入夜忽風霆千載洞雲濕四時春草腥使君祈雨罷踏遍幾峯青

招寶山觀海

纔信乾坤狹人問但水天有風波亦定不霧氣無邊黑影迷身世滄桑老歲年請從招寶望多少夜珠圓

石門觀瀑

昔聞謝康樂攬勝宿雲根一水走天半兩山撐石門靜懷相對永流響竟忘喧知子淡塵慮游闌終未言

西湖泛月

荷花著水香蓮葉當風張西子抱明鏡對人矜晚妝煙光初淺淡湖景任低昂竟挾月飛去良宵秋短長

東湖訪舊

君以凌雲氣兼之仙吏才波偕人影至山送酒船來余亦東湖
去言從北里回到時逢舊雨一爲問蓬萊

南湖煙雨

我昨住嘉禾南湖打槳過詩懷淡煙雨樓影落春波愛子窮游
興披圖足嘯歌不知憑眺處風景近如何

姚江謁王陽明先生祠

軍前儒服坐麾兵手挽銀河轉太清曠古人誰繼諸葛一杯我
獨奠先生身閑未盡匡時畧才大難辭講學名莫道奇功成太
易當年遭遇有王瓊

龍泉山晚眺

龍泉山勢壓城臺極目姚江暮色開海上神燈今不見月明依

舊送潮來

謝太傅墓口占

勲業消沉塞草斑
林泉半世占清閒
男兒三十休言困
謝傅當年未出山

渡曹娥江

青山環抱水安流
雲影天光入鏡收
秋色滿江斜照裏
四圍紅樹送歸舟

禹陵

百川手導奠神墟
尙藉餘靈鎮海隅
萬嶺勢來雲擁護
千秋迹在石模糊
繡衣入夢原飄渺
宛委藏書定有無
終是巡方勤遠涉
至今遺恨等蒼梧

古木蕭疎夕照中
川流徑改况璇宮
子孫越國人誰在
風雨塗

山會已終經畫五千歸旬服遭逢十二作司空遺民再拜無窮
思不爲平成第一功

山雄未覺氣峻嶒空石亭高翠幾層太史窺時惟有穴後王改
制久呼陵圖形漫訝山經富方物偏勞禹貢登獨惜岫嶺碑字
古門前誰解認金繩

游蘭亭

清流映帶不聞聲勝會蘭亭迹已更萬種悲懷成此序千秋驚
歎只書名賞音身後逢人主樂事圖中擅友生憑弔豈徒因內
史永和人物盡關情

登吳山大觀臺有感

煙水蒼茫集此臺紛紛殘局事堪哀駐鑿無復中原志立馬終
非霸主才四越好從圖畫看江山齊赴客心來儘多萬古登臨

眼得三南酒一杯

岳墳卜占

興亡舊事付雲煙
大樹無言向日眠
不信冬青零落盡
南枝猶護墓門前

程鶴樵先生宣撫浙中詩以奉呈

佳氣新看北斗旋
幃帷初駐鏡高懸
數遷

恩自天邊錫萬里
名從塞上傳

謂自甘肅
擺撫兩浙

赤手障波能止濁
蒼

生望信早如年
齊聲都向西湖賀
第一山川得此賢

大程宗派學淵源
小范心胸氣吐吞
十萬甲兵新虎帳
三千桃

李舊龍門

謂視學
粵東

包羅文武憑儒術
管領東南識

聖恩九曲黃河都閱遍
海天鎖鑰固藩垣

曾官山左凜冰霜
隴右開藩久拜章

天子倚公爲柱石郎君轉眼亦封疆一門建勳原殊數十月回春趁小陽要與天台比高潔夜深上告正焚香

書生踪跡愧飛蓬蘇軾當時遇魏公才拙六年猶故我門高兩度立春風孤彈白雪誰同調怒鬱青霞氣吐虹長劍卽今休別倚將軍來處自崆峒

放歌行贈陶珠泉司馬

丈夫意氣薄雲日讀書擊劍推第一頭顱三十未崢嶸蓋世才名安足惜學仙幾次術難成乃從紙上求顯榮書生久困不解事數奇妄與天公爭江南八月葉飛早秦淮煙月傷懷抱扁舟更上越王臺一夜潮聲萬馬來弔古茫茫恨無極寒意鬱雲雲不開燈前邂逅得吾子英姿磊落快無比方外司馬爾何奇古聞其人今見矣百年交誼一言始且出新詩置筵几高歌遏雲

動秋水文成破石驚鬼神世儒輕之猶灰塵通經不講治生術
賣漿賈豎皆笑人與君痛飲話千古醉倒更酌復何苦酒酣君
亦神飛揚奇論與我相低昂寶刀逼人初出匣十步以內生秋
霜願君寶此宜珍藏屈心努力爲能吏棄書從俗卽稱治莫矜
昔日切雲冠看我關河已憔悴一生傲岸苦不諧李白坐此狂
可哀我今別子東湖去冷落西冷月夜杯

偶憶

若耶溪路近天台惆悵尋春第二回一卷國風曾誤讀三生杜
牧悔多才簾前月好當牕見峽口雲深對客開可識佛天真樂
界蓮花香色奉如來

弄珠樓宴集卽席醉賦並贈竹嶼

一生好作南溟游慣隨名山爲去留若耶溪上花看遍天風催

泛東湖舟忽忽未及別西子回頭一笑隔煙水行行不覺來當
湖此身仍在明鏡裏主人倒屣心相投氣同滄海移嵩邱高談
夜漏已十下一醉直可無千秋杉亭之游未爲足飲我弄珠樓
上頭湖光四面樓全收放出雲霞走飛牖奪來蒼翠浮中流傾
尊倒壘出怪語語才何必分今古如此風光况故人奇懷不盡
更誰吐拔劍爲君復起舞諸公袞袞半開府男兒生不爲霖雨
讀書萬卷欲何補杜陵自許稷契身卻教兒輩稱神父使君昔
轉湖海春樓與雲煙同鬪新使君今宴梅花側此樓更爲開顏
色智珠在手寒生芒驪龍有耀現不得湖勢如龍樓作珠九曲
爭向湖心趨樓影蕩漾不成彩更借朗月生華腴吞吐細浪光
有無夜深佩響鳴瑤瑜疑有天女來空虛乘月玩弄勢飛動白
雲左右爲擎扶海魚到此睛模糊微風忽起珠破碎滿湖散作

青珊瑚我坐珠樓拚爛醉直須滌盡塵寰累湖波萬疊難況愁
突兀何能了人意安能身爲雲中仙呼君共飲方丈泉名與孤
月同高懸首枕芙蓉樓頂眠下視澤國空滄煙

獨坐

高齋搔首近蒼旻弔古迢遙迹已陳不分詩人頻感遇由來貞
女易懷春客途歲月空詞藻世事棋枰闕舊新贏得一編風雨
夜行藏細計倚樓身

煙雨秦淮恨別離辭家尙記束衷時妻憐屢困羞求祿母畏傷
情戒作詩識曲楚人空下里舊巢越鳥有南枝天涯回首休增
感仙侶同舟况酒卮

平生自分百無能湖海名高轉被增已恨春蠶絲委曲尙憐乳
虎氣飛騰江天浩蕩餘詩卷身世分明問客燈看遍湖波三萬

頃更窮絕壑訪山僧

客夜不寐

夢醒家山尙眼前穿櫺涼月影娟娟愁多似髮來天外事遠如雲到枕邊漏永孤懷難待曉酒消百計不成眠客中漫說良宵短如此消磨抵一年

孟塗後集卷十七

桐城劉

乍浦觀海

遠浪窮何處飛雲破混茫四圍仍內地一氣接東洋水石聲交戰魚龍勢若狂通倭此門戶鎖鑰慎邊防

巨艦高如屋登臨出世寰雲扶孤日定波靜百靈閒佛國開天

外

謂普陀

人煙沒島間浮空青數點認是海鹽山

風起洪濤激琉璃影變黃乾坤無上下雲日乍陰陽節鉞今雄鎮

本朝設都統駐防

瓊瑤舊法堂湯山卽靈境不必問扶桑

苦竹山晚眺

石塘風急舞靈鼉萬里寒潮帶晚過疊嶂翠含雲水濕夕陽紅到海天多倩妝龍女藏珠闕灑淚鮫人織素波亦有錦屏山上

約蓮花洋隔奈愁何

渡海登小落伽山觀大洋作歌

海南名勝推落伽紫雲一角天之涯竹色到天太清潔仙人灑
墨成桃花期生安地靈路阻遠難至且向小普陀一醉看山直到
海中央縱不得仙亦快意梵宮疊起高崔巍軒牕獨爲重洋開
鵬飛沒處望無極天邊疑有金銀臺山前島嶼闊靈洞最小石
輕壓寒重波心幾點綠如螺四面海風吹不動九峰飛下排海
東直欲驅入馮夷宮此山突立作屏障隔空面對青濛濛東南
百道花玲瓏霞采射浪天翻紅全海半化金夫容夫容蕩漾天
如故山腳穿波石猶怒波強激石石齒生蛟龍遙見不敢渡鐘
樓上聳凌山闌笑語飄入虛無閒到此方知與天接從前游境
皆塵寰海雲望斷迷無界天教薄霧橫如帶遠影微茫認不真

一重白氣闌天外紫濤激盪何壯哉百里未近聲先來今我身
其雲盤迴詩成投向滄洲隈詞源浩瀚果如海人世何由量此
才窮虛我已臻絕境坐見仙靈去來影未識蓬壺玉闕人空中
曰我爲何等我聞仙佛珍靈墟大士得此爲下都門與華頂正
相向潮音清妙聽有無或云白鳥來傳信曉色飛破天模糊長
虬十丈出無忌巨魚亦向東溟戲李白視鰲何太輕不義丈夫
乃爲餌且把釣竿待潮至潮生潮落徒悲號海寬不覺潮頭高
須臾水定舟如卧暮色欲下雲衝破海氣暈日朱輪大凌波龍
女顏娉婷手獻明珠衣水晶獨立不語生遙情扶我同舟入煙
霧妙香作飯和甘露佛天春滿花無數何不載將春色去林巒
回首瞻禪關隱約天空響珮環歸時一笑傲湖山我今真從世
外還

寄朱魯岑

行年三十尙儒巾痛飲狂歌對古人落莫山川吾去住崢嶸歲月汝沉淪孤帆夜雨來時夢五渚煙花別後春時歸自楚南好錄新詩勤掃葉開軒重待話風塵

東光山

滿懷奇境上東光河伯纔知愧望洋日月有時同出沒每歲孟冬朔見

日月合璧若九月無晦日則不見海天無處不蒼涼普陀風景原雙美倭國文

詞自一方在姚薌園家見琉球國詩稿聞說極東山似火有人親到沃焦傍

過陳山

層巒獨立露澄清空際無風自有聲星月共珠浮海出鯨鰲挾浪踏山行潭深長有金鱗浴霧濕難教玉宇晴如此曠觀足遺世男兒那得戀浮名

舟中贈雲起

吳越名區欲徧尋，且攜舊雨共登臨。
出羣君自親風雅，渡海人誰試淺深。
歸路客心勤計日，時雲起將返江寧度歲殘冬歲月貴如金。
回舟尚有江山約，好聽蒼龍水上吟。

海虞口占

海虞曉色傍城開，山勢參差欲壓臺。
界斷煙巒青一角，風光齊到女牆來。

過虞山有懷

絳雲勝迹久滄桑，故址人猶認夕陽。
紅豆山莊自來去，多情只弔柳枝娘。

書感

男兒七尺氣昂藏，學佛求仙兩未遑。
便擬入山卧風月，枉拋金

力事文章諸君雅望宜鐘鼎餘子多才亦棟梁短棹漁歌歸獨
晚五湖煙水正蒼蒼

自東流入徽州山中

地鎖千重險山開四面城有天通出入隔嶺判陰晴境向峯前
轉風從足下生探奇爲乘興不是愛長征

風土殊三楚林巒別一天樓臺富春色邨落聚人煙道遠皆眠
石山多惜占田空餘舊桃萼獨秀冷巖邊

石作紫霞色溪流碧玉環人行煙靄外春倦雨聲間地險遲飛
鳥愁多比亂山邊隅足風物憑眺且開顏

盡日窮幽僻風來聞暗香雜花開滿徑老樹卧斜陽亭已迷昏
曉曠猶認晉唐由來兵革少地不管興亡

絕頂裂成澗懸流百道分月明孤影現夜靜虎聲聞草宿嶺頭

雨人耕天上雲尙憐汪越國祠宇閉斜曛

過齊雲山

碧雲深鎖護靈墟百鳥銜花迹有無多少奇峯看不盡神祠日暮集啼鳥

游黃山登蓮花峯抵煉丹臺

我從海上浮舟還靈氣隱隱生袖間胸中鬱怒洩不盡更欲走險窮黃山黃山之奇絕地紀太華以外無其比只因地僻遊人稀翻使仙靈占全美今我來自萬山裏白雲一見爲驚起初從湯口望空冥青鸞紫石峯名紛縱橫振衣直到天門限諸峯漸與人身平溫泉浴罷餘芳烈洞口玉簾垂不絕懸流倒挂落深潭白龍渴飲千丈雪謂白龍潭丹霞峯名一道遙插空朱砂桃花二峯名相映紅天公亦恐山寂寞濃妝作態同春工文殊院聳何龍嵒獅

象怒立疑爭雄前有高臺後玉屏屏上咳唾生天風俯視但覺
青濛濛蓮花在右天都左兩峯之中唯夾我我欲醉上絕頂眠
山僧止余曰不可天都峻絕行路窮峯巔自古無游蹤此是山
靈心吝惜閉徑不與人世通惟有蓮花可相從石門穿過行甕
中出洞入天透石腹乃能足躡青芙蓉芙蓉直上望無極江水
遙黃海雲黑人在蓮心低處立千朵中天闕顏色須與日空山
難遮滿峯齊吐金蓮花石瓣中開含雲霞瓊瑤作膚石作骨露
洗花房翠如活忽然風起吹仙關蓮花搖蕩態自閒我身不動
將花攀恐隨蓮隊落人寰旁有一峯似蓮蕊壁立直削青見底
萬古含苞若處子更有蓮葉形低眠葉中不雨長留泉氣與風
勢相周旋興闌纔下雲梯級鰲魚出洞作人立謂鰲神鵲引上
平天崗到此地闊無低昂雲氣鋪海天汪洋其餘怪石各千出

人鬼禽獸難具述境竒一步卽換形三十六峯無複筆我游未
盡神已疲歸路草草穿翠微容成浮邱_{二峯名}留不住蒼云去浣
青蘿衣峯頭老人向余笑_{山中有老人峯似爲此游誇竒妙}我對無言
發長嘯戲將澗口卧龍松與翁相較誰年少百花洞口多奇香
山中靈藥仙人糧聞有異花三百種畫工圖去今無芳名山遇
合亦由數別君咫尺屢回顧出山醉作黃海歌寫來滿紙是雲
霧

孟塗後集卷十八

桐城劉開明東

寄陳碩士編修

薊門秋色接龍舒
兩地離懷托雁魚
館閣仍留天下望
拾遺曾上舊時書
一春桃李看重植

時分校春闕

六月芙蓉伴索居
獨恨金

臺言別後三年蹤迹尙樵漁

潦倒頻蒙惜楚冠
看君隻手障波瀾
文章並派同心折
貴賤論交共歲寒
南國聲華誰領袖
少年卿相自長安
關情卻憶金陵路
祇恐羊曇淚未乾

謂婿舅夫子

金陵口占

秣陵原是舊吳宮
花月南朝自始終
楊柳拂天空夕照
芙蓉帶露別秋風
千年興廢成詩史
一代馨香奉鬼雄

謂蔣祠

獨羨小喬

得佳壻歌詞艷唱大江東

客中憶昔

卧聞帝子雲中瑟醉謝梁王座上杯萬里我猶嫌路短四時天
易縱秋來思家節候江流急落葉關河雁別哀辛苦少陵多感
慨登臨愁到最高臺

題周南卿品茶圖

午牕睡起閒花落酒香不解秋懷渴茶鐺風細爐煙清半甌綠
淺濃如酪東坡酷愛密雲龍君之嗜好母乃同茶經熟讀意未
足製器精巧非人工飲雖小道總師古我宗杜康君陸羽座上
休誇醒酒功酌久纔知味甘苦品茶品水須兩全水清宜用活
火煎問君日試西湖水何似金山第一泉

過陽湖弔惲子居明府

聞笛山陽灑淚過高談憶昔共關河一官夢境同蕉鹿千載文
名亦逝波歸去江南新著少邇來泉下故人多玉樓作賦原常
例卻恐瓊臺令又苛

哭王悔生先生

大雅終何屬吾鄉喪老成千秋存隻字孤月照平生世俗爭浮
艷空山冷舊盟西風重灑涕不是爲交情

早歲騰華譽才空萬馬羣游窮黃海日

先生前後
在徽最久

歸卧碧天雲

一別思傳語重泉可再聞向來酬唱意獨坐對斜曛

白首遺經在名山閱古今枯桐留正響老樹識秋心竟逐風雲
去徒令歲月深膝前有名驥已喜作龍吟

知己半寥落先生今又歸此心惟自許吾道復誰依井底蛙空
噪天邊鶴獨飛恐勞魂入夢不許掩柴扉

存歿論身世艱辛此一官家貧長物少星落大江寒飄渺珊瑚
筆凄涼首藉盤焚將數行字地下問平安

過岐嶺

飛巒疊起逼高穹絕頂中開出梵宮積氣千重生雨露晴嵐一
道劃舒桐桐城與舒城以此嶺分界川原出沒寒鴉外身世蒼茫曉炤中便
欲憑虛逐雲去金雞啼罷舞天風俗名嶺爲金雞嶺

自西湯池入小河口宿道中

懸崖直下吼泉聲二水交流作勢迎地入荒原稀見樹山當僻
路半無名親朋寥濶踈音問客夢驚疑昧死生時夢亡友張小阮相對如生時
曉起渡河更回首峯巒雲破有人行

酬伯昂侍講見贈之作卽送入都

霄漢神交各十年君臨京洛我游燕余丙子入都時君視學河南未及晤見豈知

一夕論文地仍是三春故國天絕塞河山皆舊識謂主試中州
人物定誰先風雲此處前途護珍重詩名北斗邊

奉懷桂舫先生

江波浩蕩海雲深都是龍門別後心一曲人間新製搦十年天
上舊知音布春能使秋臺暖覆物真同夏日陰我識荊州原未
晚鉛刀無分作南金

大雅瑤壇孰主裁先生巨筆掃雲開中天鸞鳳隨簫至南海珊
瑚入網來先生會撫粵東好古襟懷澄水月憐才意氣動風雷少陵舊

感韋公遇三十功名志肯灰

書懷

已窮紫塞更滄洲南北關河感壯游客路最難平意氣英雄未
免重恩仇酒杯事業償青史詩卷功勲累黑頭亦有防身長劍

在斬蛟不用試吳鉤

贈召虎

召虎爲亡友張阮林之子端謹早慧今隨其舅氏伯昂太史入都感今懷昔不勝凄然因賦此贈之卽以送行

會同阮籍醉斜曛別去人天事莫論四海獨憐吾浪跡十年喜見汝能文聞呼父執心翻痛說到京華手易分雛鳳聲清出丹穴風高前路卽青雲

許叔翹將游粵東與余遇於皖上盤桓累月別去寄之以詩

紛紛樹立看兒曹白髮談兵首自搔話到風塵頻灑淚興來江閣忽飛濤能知恩義惟名馬不耐愁煩是寶刀我已三年豪氣減因君詩思逼天高

寄鶴樵中丞

使者東瀛又步春
濟南威望一時新
調停近海三齊俗
鄭重焚香五夜身
帶甲人多誇勇悍
魚鹽政易返清淳
民間疾苦應勤告
公本西垣舊諫臣

雜咏

萬疊山環春水深
懷人天末信初沉
聲華舉世交推日
事業中宵獨坐心
孤鳳不飛原有待
蒼龍未老任高吟
君看司馬游梁倦
天子親征賦上林

層軒四壁起秋濤
拔劍寒生氣獨豪
歸客南來春雁盡
中原北去浪雲高

朝廷已切蒼生慮
都尉休辭白日勞
聞說詔書嚴黜陟
城中持節幾吾曹

憶昨浮舟大海還鯨鰲不動水天閒虛傳身到蓬瀛外豈有文
懸日月間倦後逃名甘白屋歸來謝病卧青山邨隣野老時相
訊爲報柴門草不刪

長安風雨故園身兩地愁連句各新客裏夢寒今憶別江南花
落我留春無情歲月消明鏡有壽文章讓古人抱得龍門書一
冊平生託契更誰親

康衢

康衢交交盡龍媒超軼誰爲出世才將相功名原瓦石神仙富
貴在樓臺風吹遠島金霞動日射扶桑玉宇開最是天宮破資
格聖凡都許向蓬萊

寄呈英煦齋先生

燕山萬疊擁

神京中有卿雲捧日明

九殿恩隆天有色五城令肅夜無聲
章平事業看重繼韓富勲名羨早成
手轉鴻鈞扶

紫極獨能青眼向儒生

相馬曾空冀北羣生平高誼薄風雲
勝收龍虎三千士部領貔貅百萬軍

紫禁論功褒語在黑頭憂

國寸心勤如何李白烏棲曲也辱中朝賀監聞

敢誇注易飲三爻卻爲逃名賦解嘲
古樹雲陰棲老鶴空山雨氣鬱潛蛟
高軒有句驚韓愈矮屋無緣比孟郊
若使九方頻許顧龍媒豈定出蒲梢

章門喜晤雪盃卽贈

豈不樂歡宴其如別促何語因深夜切才爲有情多好句思千古名山愧再過良時須努力吾已悔煙波

尙僑客以五言古體見贈詩以酬之

身世無端此一樽天教會合始章門緇塵我已憎行色青史君

能雪舊冤

謂三國志辨微

涼夜難忘溫後酒關心最是別時言片帆歸

看梅花發定憶相尋話夕曛

不寐

無術消長夜殘燈照夢青不愁千里遠翻畏五更醒枕上成詩易階前又雨停明朝故人約載酒且江寧

如此

如此還爲客男兒亦足羞同游多建節壯志獨扁舟作賦空黃絹驕人但黑頭茫茫今古恨不肯付東流

題雪盃詩卷

抱得高秋獨繭琴十年吾忝作知音不圖南國飛鴻日又聽西
山別鶴吟月好尙思前夜句酒多無奈醒時心留題珍重臨歧
意門外章江爾許深

贈張雲齋

不謂江天濶新知獨此人文章空意氣吾輩合風塵哀樂非關
別窮愁勉愛身詩囊富煙月休歎一官貧

楚南懷古

瀟湘風景富波濤石色青紅壓半篙地有文詞開戰國天生芳
草爲離騷江聲北去羣流集山勢南盤萬疊高欲乞靈均佩難
得更誰步馬憶蘭皋

弔古愁登望遠亭悲來卷裏鬱風霆天當七國原難問人異三

間敢獨醒佛嶺露高全楚白巴陵水接遠山青金盤玉筍游何
益終有奇懷破八溟

岳陽樓上俯平川五渚三湘勢總連夜久波光齊襯月曉來水
氣盡成煙乾坤浩蕩偏宜客身世空靈合遇仙到此漫言懷抱
濶飽吞雲夢已多年

倚檻臨風感物華弱年爭弔賈長沙並時誰肯憐王佐異代人
猶惜漢家謫宦至今悲地濕粗才如我亦天涯休論作賦投書
事寥落湘江日影斜

長風吹送洞庭舟勢截洪濤去不留日月晦明千里氣水分
合一湖秋仙峯遠近誰朱鳥人世行藏有白鷗盼到高空飛翠
沒君山隱約等浮漚

雲中鼓瑟憶湘靈曲奏蒼龍隔水聽天外乍寒聲嫋嫋湖心獨

立霧冥冥千年山色連空碧
一點眉痕太古青
愁絕瓊宮最深處
露涼秋重濕娉婷

聞道衡陽近九垓
仙人花藥閉蒼苔
朱陵闕洞成深室
紫蓋擎天卷怒雷
日出未高雲下走
雁飛不到我南來
古今都笑山靈客
只爲昌黎面一開

九疑峯勢聳千尋
草長寒連曲徑深
雲氣入林天自遠
露壇積翠日長陰
文章斑竹雙妃淚
風雨蒼梧萬古心
我有多詞陳未得
匣中新貯五弦琴

長江已過歷新灘
險入三門路幾盤
蘿薜未逢山鬼笑
蕙蘭宜作美人看
孤芳木末清秋晚
大澤雲陰白日寒
何似潭州褚都督
池頭詩思海天寬

紫雲剝落白霞新

皆山名

一路煙巒入望頻
言鳥巧呼舟上客
蠻

花紅識漢時人瓊瑤祠宇都成俗沙石山川亦受春可笑桃源
仙宅陋等閒漁父許尋津
蓮花峯險未堪攀採得芙蓉意自閒近嶺風煙疑有瘴出湖曉
氣欲移山人來湘水騷情發草遇王孫古恨惻太息永州谿壑
勝柳侯謫後始開顏

咏柳毅

綃縠明璫想夙因憐才惟有洞庭神三生雲水猜疑事一夕仙
凡婉變春不信通辭惟橘樹翻教尺素作冰人珠宮遇合原無
定柳毅當年下第身

贛州喜晤王子卿太守卽用留別

枯桐那作鳳鸞吟天末孤琴有賞音千里行因知己緩五年交
到此時深高才領郡隆勲績異國同鄉識素襟二水流長山萬

登一樽難盡對談心

黃樓自昔認坡仙

謂在徐州

別後相思又各天愧我虛名消半世感

公一語足千年海雲浩蕩驚詩思夜火高吟共酒筵不向瑤壇

逢舊識憐才肯信古人偏

抵寧都贈夢白刺史

片帆飛入萬山來直爲尋君住水隈路石青連高士宅

謂三魏故居

夜燈紅照故人杯望中崖洞迷仙迹

謂金精洞

別後風雲展吏才漫

怪論文語難盡三年懷抱到今開

游金精洞作歌

海內名山游欲窮來此徑探瓊瑤宮山勢拔地都成峯一十二

瓣金芙蓉唯此女仙廬其中洞門雖開雲長封雙桃色帶西漢

紅

洞內有雙桃石漢仙女張麗英遺跡

卻聘上昇果眞否傳聞豈必盡烏有安知

仙人非好名借此留奇千載後金精得名二千春琪花開老無
纖塵我來猶欲叩蒼旻金星曾降爲李白如何先幻作女身毋
乃天仙弄狡獪要使才人詩境新入洞數武已驚異穿過雲根
阻塵世忽然天日中開顏又從世外來人間丹崖青嶂誰位置
似有神工非人意一碧從空削到地四圍山色方丈天石髮數
縷空際懸山腰一縫忽中裂滴下千尺飛來泉墜如細雨散如
煙我坐石上對雲樹舉杯弔古感仙遇山靈怪我來何遲中有
夙因人不知天臺之游旣未果此行恍與仙風期身騎紫雲歸
瑤池令人想見冰玉姿環珮一去鬢雲冷好山無復青蛾眉我
今有語書絕壁麗英見之應嘆惜乘鸞爾已成仙姬題詩我尙
爲游客洞天原自在人寰仙凡但隔一層石咫尺不見奈山河
神草靈芝空復多不須更說天臺約眼底誰傳石鼓歌

石鼓詩
卽麗英

作

登翠微峯頂

翠微直起勢孤懸山腹微開日影穿石磴四圍皆峭壁人從一
線上青天羣巒爭欲分煙靄逸士真能比地仙卽魏叔子遊亂處不信
桃源在空際避秦絕頂足風煙

喜晤蔣涿初明府卽席有贈

七年纔得共芳樽宦海名場總莫論父老爭傳賢令尹故人猶
是舊王孫雲霄事業孤懷淡江海文章幾派存便欲辭君徑東
下萬重飛翠鎖前邨

過灘口占

章貢波濤走復回扁舟無日不風雷如今應識人間險十八灘
頭兩度來

答黃石怡見贈之作

乍見驚猜認轉疑
翻因久別等新知
八年雲水難言事
一日江天痛飲時
劍氣怒憑杯酒出
燈光寒耐夜風吹
深談反覺當時淺
從此論交重後期

留別尹若亭明府

歲月迢迢促去輪
征途欲發尙逡巡
自知才拙難宜俗
轉爲名高學避人
兩度雲山驚客至
十年風雨獨君親
關河歷遍休相惜
贏得精金百鍊身

贈介石

爾我重高會
江天幾嘯歌
詩緣爲客富
酒到異鄉多
小住宜書刺
爲歡艷綺羅

時已完婚

盛年好風日
青鬢莫蹉跎

送雲齋之貴溪

徹骨冰霜滿面塵相逢各訝客中身路逢知己休言困人是深
交敢諱貧一鳥趁飛將暮日萬花爭待未來春扁舟去訪仙靈
宅

時奉檄之
上清宮

知否名山悟夙因

將抵大雷寄內

愿盡艱虞事總違十年累汝製征衣本非是聚何爲別容易相
違不算歸倦後辭家孤夙願愁中忍淚對斜暉如今且喜雷池
近

內子家
在大雷免向高樓數雁飛

饑驅憶昔泛扁舟不是蕭郎愛遠遊勸隱多時催買宅求名早
歲薄封侯高堂眠食應縈夢小婢追隨未解愁閒卻空庭好秋
色來時雲影在簾鉤

落花時節病經旬減盡腰圍爲惜春偶聽恩仇心激烈每因兒
女淚酸辛

謂女珠
兒早殤

良宵未必愁能遣好夢由來記不真擬向妝

樓更開牖畫眉須襯月華新

歸寧曾記話悲歡
趁到鄉園又歲闌
寒夜挑燈今昔共
貧家作婦笑啼難
重提往事還生感
已近歸期強自寬
尙隔龍眠三百里
見時莫便認團圞

次吳松岑明府見題拙集韻

座有黃花勝玉蕖
酒酣覓句步庭除
相逢且盡今宵話
別後書來總不如

廿年作宦負多才
一日詩成爲我開
漫道寸心甘苦似
匡山曾共劈雲來

王簞山觀察以新詩見示卽題卷後

客路三千里新詩
四百篇入懷皆水
月到手化雲煙獨
步誰同調高吟抵
十年笑他郊島輩
辛苦坐空瓊